

四庫全書

史部

欽定四庫全書

唐會要卷七十六

宋 王溥 撰

貢舉中

進士

貞觀八年三月三日詔進士試讀一部經史

二十二年九月考功員外郎王師旦知舉時進士張昌齡王公瑾並有俊才聲振京邑而師旦考其大策全下

舉朝不知所以及奏等第太宗怪無昌齡等名因召師
旦問之對曰此輩誠有文章然其體性輕薄文章浮豔
必不成令器臣若擢之恐後生相效有變陛下風雅帝
以為名言後並如其言

調露二年四月劉思立除考功員外郎先時進士但試
策而已思立以其庸淺奏請帖經及試雜文自後因以
為常式

開元二十四年十月禮部侍郎姚奕請進士帖左氏傳

禮通五與及第乾元初中書舍人李揆兼禮部侍郎揆
嘗以主司取士多不考實徒峻其隄防索其書策殊不
知藝不至者居文史之圃亦不能摘其詞藻深昧求賢
者也及其試進士文章日于中庭設五經及各史一切
詔本于牀而引貢士謂之曰國家進士務得才經籍在
此務尋檢由是數日之間美聲上聞

上元中劉曉上疏曰國家以禮部為孝廉之門考文章
于甲乙故天下響應驅于才藝不務于德行夫德行者

可以化人成俗才藝者可以約法立名故有朝登甲科而夕陷刑制制法守度使之然也陛下焉得不改而張之至如日誦萬言何關禮體文成七步未足化人昔子張學干祿仲尼曰言寡尤行寡悔祿在其中矣又曰行有餘力則以學文今舍其本而修其末況古之作文必諧風雅今之末學不近典謨勞心于丹朱之間極筆于烟霞之際以此成俗斯大謬也昔之採詩以觀風俗咏卷阿則忠臣喜頌蓼莪而孝子悲溫良敦厚詩教也豈有

淫文哉夫人之愛名如水之就下上有所好下必甚焉陛下
若以德行為先文藝為末必須勵行以佇甲科鄴舒俊
才擯而沒齒陳寔長者拔而用之則多士雷奔四方風
動從欲于下聖理于上豈有不變者哉

永徽元年始制兩都舉禮部侍郎官號皆以兩都為名
每歲兩地別放及第自大歷十二年停東都舉是後不
置

建中二年十月中書舍人權禮部貢舉趙贊奏先是進士試

詩賦各一篇時務策五道明經策三道今請以箴論表
贊代詩賦仍試策二道

三年四月勅禮部進士舉人等自今已後如有試官及
不合選并諸色出身人等應舉者先于舉司陳狀准例
考試如才堪及第者送名中書門下重加考覈如實才
堪即令所司進納告身注毀官身准例與及第至選日
仍稍與處分其正員官不在舉限

元和二年十二月勅自今已後州府所送進士如跡涉

疎狂兼虧禮教或曾任州府小吏有一事不合清流者
雖薄有辭藝並不得申送如舉後事發長吏奏停現任
如已停替者二年本試官及司功官見任及已停替並
量事輕重貶降仍委御史臺常加察訪

長慶元年勅今年錢徽下進士鄭朗等一十四人宜令
中書舍人王起主客郎中知制誥白居易重試覆落十
一人三月丁未詔國設文學之科本求實才苟容僥倖
則異至公訪聞近日浮薄之徒扇為朋黨謂之關節干

擾主司每歲策名無不先定永言敗俗深用興懷鄭朗等昨
令重試意在精覈藝能不於異書之中固求深僻題目貴令
所試成就以觀學藝淺深孤竹管是祭天之樂出于周禮正
經閱其程式之文都不知其本事辭律鄙淺蕪累可知其孔
溫業等三人粗通可與及第其餘落下今後禮部舉人宜准
開元二十五年勅及第人所試雜策先送中書門下詳覆
三年正月禮部侍郎王起奏曰伏以禮部放榜已是成
名中書重覆尚未及第重覆之中萬一不定則放榜之

後遠近誤傳其于事理實為非便臣伏請今年進士堪及第者本司考試訖其詩賦先送中書門下詳覆候勅却下本司然後准舊例大字放榜從之

太和七年八月禮部奏進士舉人先試帖經并畧問大義取經義精通者次試議論各一首文理高者便與及第其所試詩賦並停者伏請帖大小經各十帖通五通六為及格所問大義便與習大經內准格明經例問十條仍對衆試口義伏使准新制進士畧問大義緣初釐

革今以通三通四為格明年以後並依明經例其所試
議論請限五百字以上成勅旨依奏

八年正月中書門下奏進士放榜舊例禮部侍郎皆將
及第人名先呈宰相然後放榜伏以委在有司固當精
慎宰相先知取舍事匪至公今年以後請便令放榜不
用先呈人名其及第人所試雜支及鄉貢三代名諱並
當日送中書門下使令定例勅旨依奏

其年十月禮部奏進士舉人自國初以來試詩賦帖經

時務五道中間或暫改更旋即仍舊蓋以成格可守所
取得人故也去年八月勅節文先試帖經義議論等以
臣商量取其折衷伏請先試帖經數通依新格處分勅
旨依奏

九年十二月中書門下奏今月九日閣內面奉進止令
條流進士數及減下諸色八仕人等准太和四年格及
第不得過二十五人今請加至四十人明經准太和八
年正月勅令減下人數外及第不得過一百一十人今

請再減下十人

開成元年二年三年並高錯知貢舉每年皆恩賜題目
放及第並四十人

會昌三年正月勅禮部所放進士及第人數自今後但
據才堪即與不要限人數每年止於十人五人亦可

四年二月權知貢舉左僕射太常卿王起下及第二十
五人續四人堪放及第楊知至竇緘楊嚴鄭朴源重勅
祇放楊嚴及第餘並落下

其年十月中書門下奏朝廷設文學之科以求髦俊臺閣清選莫不由茲近緣覈實不在于鄉閭趨名頗雜于非類致有跋扈之徒請託交通將澄化源在舉明憲臣等商量今日以後舉人于禮部納家狀後望依前五人自相保其衣冠則以親姻故舊久同遊處者其江湖之士則以封壤接近素所諳知者為保如有缺孝弟之行資朋黨之勢跡由邪徑言涉多端者並不在就試之限如容情故自相隱蔽有人糾舉其同舉並三年不得赴

卷七十一
舉仍委禮部明為戒勵編入舉格勅依奏

五年二月諫議大夫權知貢舉陳商放及第二十七人
其年三月勅戶部侍郎翰林學士向敏中重試覆落七
人

其月中書門下奏貢舉人並不許于兩府取解仰于兩
都國子監就試

大中元年正月禮部侍郎魏扶放及第二十三人續堪
放及第三人封彥卿崔珣鄭延休等皆以文藝為衆所

知其父皆在重任不敢選取其所進詩賦奉進止令翰林學士戶部侍郎知制誥韋琮等考畫合程度其月二十三日奉進止並付所司放及第有司考試祇合在公如涉徇私自典刑從今以後但依常例取舍不得別有奏聞

其年六月中書門下奏貢舉人取解宜准舊例于京兆河南府集試從之

二年正月中書門下奏從貞元元年太和九年秋冬之前

皆是及第便從諸侯府奏試官充從事兼史館集賢弘
文諸司諸使奏官充職以此取人常多得士由是長不
乏材用太和末會昌中通四選諸方得奏州縣官充職
如未合選並不在申奏限臣等昨已奏論面奉進止自
今已後及第後第三年即任奏請勅旨依奏

天祐三年三月勅今年禮部所放進士依去年人數外更
放兩人

緣舉雜集

長壽二年二月左拾遺劉承慶上疏曰伏見比年以來天下諸州所貢物至元日皆陳在御前惟貢人獨于朝堂列拜則金帛羽毛并于玉階之下賢良文學棄彼金門之外恐所謂貴財而賤義重物而輕人伏請貢人至元日列在方物之前以備充庭之禮制曰可

開元五年九月勅諸州鄉貢進士見訖宜令引就國子監謁先師學官為之開講質問疑義仍令所司優厚設食兩館及監內得解舉人亦准此其日清官五品已上

及朝集使並往觀禮為常式

謁先師自此始也

十九年六月勅諸州貢舉皆于本貫籍分明者然後依例不得于所附貫便求申送如有此色所由州縣即使催科不得遞相容許

二十四年九月二十日禮部以貢舉請別置印

天寶十二載七月十三日天下舉人不得充鄉試皆須補國子學士及郡縣學生然後聽舉至至德元年已後依前鄉貢永泰元年七月以京師米貴遂分兩京集舉

人至大厯十年五月十九日勅今年諸色舉人悉赴上都准舊例十月二十五日隨考試

興元元年中書省有柳樹建中末枯至是再榮人謂之瑞柳禮部侍郎呂渭試進士以瑞柳為題上聞而惡之貞元七年兵部侍郎陸贄權知貢舉時崔元翰梁肅文藝冠時贄輸心於肅與元翰推薦藝實之士升第之日雖衆望不愜然一歲選士纔十四五數年之內居臺省者十餘人

十六年十二月勅禮部別頭舉人宜委禮部考試不須置別頭

十八年五月勅明經進士自今已後每年考試所拔人明經不得過一百人進士不得過二十人如無其人不必要補此數

十九年勅禮部舉人自春已來久憊時雨念其旅食京邑資用屢空其禮部舉人今年宜權停

元和十三年十月權知禮部侍郎庾承宣奏臣有親屬

應明經進士舉者請准舊例送考功試從之自貞元十六年高郢掌貢舉請權停考功別試識者是之自今始復太和元年二月勅自今已後天下勲臣節將子弟有能修詞尚學應進士明經及通史學者委有司務加獎引其年七月勅今年宜權于東都置舉其明經進士便在東都赴集其上都國子監舉人等合在上都試及節目未盡者條流奏聞

八年正月禮部侍郎李洪奏准太和七年八月勅貢舉

人不要試詩賦策且先帖大經小經共二十帖次對正
義十道次試議論各一首訖考覈放及第九月勅吏部
禮部兵部今年選舉並緣伏末蟲旱相因恐致災荒權令
停罷及斂藏之後物力且任念彼求名之人必懷觖望
之念寧違我令以慰其心宜依常例却置應緣所納文狀
及銓試等期限仍准今年格文遞延一月

大中元年正月勅自今放進士榜後杏園任依舊宴集
所司不得禁制先是武宗始遊巡曲江亭禁人宴聚故

也

十年四月禮部侍郎鄭穎達諸家科目記十三卷勅付翰林自今放榜後即寫及第姓名及所試詩賦題目進入內仍付所司逐年編次以用軍之際權停貢舉一年咸通十一年四月勅去年屬以用軍之際權停貢舉一年今既偃戈却宜仍舊來年宜別許三十人及第進士十人明經進士二十人已後不得援例

制舉科

顯慶三年二月志烈秋霜科韓思彥及第

乾封元年幽素科蘇瑗解琬苗神容格輔元徐昭劉納
言崔谷神及第

上元三年正月詞殫文律科崔融及第

永隆元年岳牧舉武涉縣尉員半千及第上御武成殿
親問曰兵書云天陣地陣人陣各何謂也半千對曰臣
謂載籍多謂天陣謂星狐虛也地陣謂山川向背也人
陣謂編伍彌縫也以臣愚見謂不然矣夫師出以義有

若時雨得天之時此天陣也兵在足食且耕且戰得地之利此地陣也士卒輕利將帥和睦此人陣也使三者去矣其何以戰上深賞之

垂拱四年十二月辭標文苑科房晉皇甫瓊王旦及第永昌元年正月蓄文藻之思科彭景直及第抱儒素之業科李文愿及第

長壽三年四月臨難不顧徇節寧邦科薛稷寇泚及第證聖元年長才廣度沈迹下僚科張漪及第

通天元年文藝優長科韓琬及第

神功元年九月絕倫科蘇頲崔玄童袁仁敬何鳳孟溫
禮洪子輿盧從愿趙不欺及第

大足元年理選使孟詵試拔萃科崔翹鄭少微及第疾
惡科馮萬石及第

長安二年龔黃科馬克麾及第

神龍二年才膺管樂科張大求魏啟心魏愔盧綯張文
成褚璆成廩業郭鄰趙不為及第才高位下科馮萬石

晁良正張敬及第

三年才堪經邦科張九齡康元懷及第賢良方正科蘇
晉宋務光寇泚盧怡呂恂及第

景龍二年抱器懷能科夏侯銛及第茂才異等科王敬
從盧重玄及第

景雲二年文以經國科袁暉韓朝宗及第藏名負俗科
李俊之及第

先天二年文經邦國科韓休及第藻思清睿科趙冬曦

及第寄以宣化則能興化變俗科郭璘之及第道侔伊
呂科張九齡及第手筆俊拔超越流輩科杜昱張子漸
張秀明常無名趙居正賈登邢巨及第

開元二年直言極諫科梁昇卿袁楚客及第哲人奇士
逸倫屠釣科孫逖及第良才異等科邵閏之崔翹及第
文儒異等科崔侶褚庭晦及第文史魚優科李昇期康
子元達奚珣及第

六年博學通議科鄭少微蕭誠及第

七年文辭雅麗科邢巨苗晉卿褚思光趙良器及第

十二年將帥科裴敦復房自謙及第

十五年武足安邊科鄭昉樊衡及第高才沈淪草澤自

舉科鄧景仙及第

十七年才高未達沈迹下僚科吳翬及第

十九年博學宏詞科鄭昉陶翰及第

二十一年多才科李史魚及第

二十三年王伯科杜綰及第智謀將帥科張重光崔圓

李廣琛及第

天寶元年文辭秀逸科崔明允顏真卿及第

六年風雅古調科薛據及第

十三年二月辭藻宏麗科楊綰及第

大曆二年樂道安貧科楊膺及第

六年諷諫主文科鄭珣瑜李益及第

建中元年賢良方正能直言極諫科姜公輔元友直樊

澤呂元膺及第文辭清麗科奚陟梁肅劉公亮鄭轅沈

封吳通玄及第經學優深科孫泚黎逢白季隨及第高
蹈邱園科張紳魏良儒蘇哲及第軍謀越衆科夏侯審
平知鄭儋凌正周渭丁俛及第孝弟力田聞於鄉閭科郭
黃中崔浩李牧及第

貞元元年九月賢良方正能直言極諫科韋執誼鄭利
用穆質楊鄒裴復柳公綽歸登李方崔邠鄭敬魏弘簡
沈迴元祐徐袞及第博通墳典達于教化科熊執易劉
簡甫及第識洞韜畧堪任將帥科許贇及第

四年四月賢良方正能直言極諫科崔元翰裴次元李
彞崔農史年陸震柳公綽趙參徐弘毅韋彭壽鄒儒立
王乃杜綸元易王真及第清廉守節政術可稱堪縣令
科李巽及第孝弟力田聞於鄉閭科張皓及第

十年十二月賢良方正能直言極諫科裴垪王播朱諫
裴度熊執易許堯佐徐弘毅崔羣皇甫鏐王仲舒許季
同仲子陵鄭仕材邱穎及第博通墳典達于教化科朱
穎及第詳明政術可以理人科張平敬李敬亮及第

元和元年四月才識魚茂明于體用科元稹韋惇獨孤
郁白居易曹景伯韋慶復崔綰羅讓崔護薛存慶韋珣
李蟠元修沈傳蕭俛柴宿及第達于吏理可使從政科
陳岵及第

三年四月賢良方正能直言極諫科牛僧孺皇甫湜李
宗閔李正封吉弘宗徐晦賈餗王起郭球姚弋叟庾威及
第博通墳典達于教化科高郢陸旦及第軍謀宏達材
任將帥科樊宗師及第達於吏理可使從政科蕭睦及第

長慶元年十二月賢良方正能直言極諫科龐嚴任
晚呂述姚中立韋曙李回崔龜從韋正貫崔知白陳玄錫
及第詳明政術可以理人科崔郢及第軍謀宏達材任
將帥科吳思李商卿及第博通墳典達于教化科李思
玄及第

寶歷元年四月賢良方正能直言極諫科唐紳楊儉韋
端符舒元褒蕭敞楊魯士來擇趙祝裴憚韋繇李昌寶
嚴楚封李涯蕭夷中馮球元晦及第詳明吏理達于教

化科韋正貫及第軍謀宏達材任邊將科裴儔侯雲章及第

太和二年閏三月賢良方正能直言極諫科李邵裴休裴素南卓李甘杜牧馬植鄭亞崔博崔璵王戎羅邵京崔渠韓賓崔慎田愔韋昶崔煥崔儼及第詳明吏理達于教化科宋昆及第軍謀宏遠堪任將帥科鄭冠李式及第

載初元年二月十四日試貢舉人于洛城殿前數日方

畢殿前試人自茲始也

天授三年右補闕薛謙光上疏曰國以得賢為寶臣以
貢士為忠是以子皮之讓國僑鮑叔之推管仲燕昭委
兵于樂毅苻堅托政于王猛此由識士之深也若宰我
見遇于仲尼逢萌被知于文叔韓信無聞于項氏毛遂
不齒于平原此失士之故也何者比來薦舉多不以才
假譽馳聲互相推獎希潤身之小計忘臣子之大猷非
所以報國求賢副陛下翹翹之望也古之取士有異于

今先觀名行之源考其鄉邑之譽崇禮讓以勵已揚信義以標聲以敷材為先最以雕蟲為後科故人崇勸讓之風俗去輕浮之行希古者必修確然不拔之操行難進易退之規衆議已定其高下郡將難誣于曲直故計貢賢愚即州將之榮辱穢行彰露亦鄉人之厚顏是以李陵降而隴西慙段干隱而西河美故名勝于利則小入之道銷利勝于名則貪暴之風扇是知化俗之本須擯輕浮晉冀缺以蹈禮升朝則晉人知禮文翁以儒林

獎俗則蜀士從儒未有上之所好而下不從其化者也
自七國之計雖雜縱橫而漢世求才猶徵百行是以禮
節之士道德自修里閭推高然後為府寺所辟魏氏取
人尤愛放達晉宋之後祇重門資獎為人求官之風乖
授職惟賢之義有梁薦士雅愛屬辭陳氏簡賢特珍賦
詠故其以詩酒為重不以修身為務逮至隋室餘風尚
存開皇中李諤疏論之曰魏之三祖雅好文辭世俗以
此相高朝廷以茲擢士故文章日煩其政日亂帝納李

諤之策由是下制禁斷文華浮辭其年泗州刺史司馬
幼之以表不典實得罪于是風俗改勵政化大行煬帝
嗣興又變前法置進士等科于是後生之徒復相倣倣
緝綴小文名之策學不指實為本而以虛浮為貴有唐
纂厯雖改草于前非陛下君臨治察方于其理樹本崇
化唯在旌賢今之舉人有乖事實議論決小人之筆行
修無長者之風第策喧競于州府祈恩不勝于拜伏或
明制纔出試遣搜敷馳驅府寺之門出入王公之第察

其行而度其才則人品于茲見矣徇己之心切則至公之理乖貪仕之性彰則廉潔之風薄是知府命雖高異叔度勤勤之讓黃門已貴無秦嘉耿耿之辭縱不能挹已推賢亦不肖待于三命祇如才應經邦之流准令試策武能制敵之列祇驗彎弧若其文擅清竒便充甲第藻思微減旋即告歸以此牧人恐乖事實且曠代鴻筆則潘岳靈運辭雄百夫矣平津文劣于長卿子建才麗于荀彧或以射策為最則司馬必居公孫之右若使協

贊機猷則安仁靈運亦無裨益之補由此言之不可一
槩取也至如武藝則趙雲雖勇資諸葛之指撝周勃雖
雄乏陳平之計畧若使樊噲居蕭何之任必無指縱之
機使蕭何典戲下之軍亦無免主之效是知謀將不取
于弓馬良相不資于射策伏願降明詔頒峻科斷浮虛之
餘辭取實用之良策文則試以効官武則令其守禦初
既察言觀行終則循名責實謹按漢法所舉之主終身
保之揚雄之坐田儀責其冒薦成子之居魏相酬于得

賢賞罰之令行則請謁之心絕退讓之義著則貪競之路銷不實免王丹之官得人加翟璜之賞自然舉得真才則君子之道長矣

景雲元年十二月制四方選集羣才輻湊操斧伐柯求之不遠其有能習三經通大義者綜一史知本末者通三教宗旨究精微者善六經文字辨聲象者博雅曲度和六律五音者韜畧學孫吳識天時人事者暢于辭氣聰于受領善敷奏吐納者咸令所司博採明試朕親擇

焉

開元八年三月上親策試應制舉人于含元殿謂曰古有三道今減從一道近無甲科朕將存其上策務收賢俊仍令有司設食

二十六年正月勅孝弟力田風化之本比來將同舉人考試辭策今後兩事兼著狀迹殊尤者委所由長官特以名薦更不須隨考便例申送

天寶十三年十月一日御勤政樓試四科舉人其辭藻

宏麗問策外更試詩各一道

制舉試詩
賦從此始

元和三年三月勅制舉人試訖有逼夜納策計不得歸者並于光宅寺止宿應巡檢勾當官吏并隨從人等待舉人納策畢並赴保壽寺止宿仍各仰金吾街使若人監引送至宿所如勾當勿令喧雜其年四月以起居舍人翰林學士王涯為都官員外吏部員外郎韋貫之為果州刺史先是策賢良詔楊于陵鄭敬李益與貫之同考覈是時牛僧孺皇甫湜李宗閔條對甚直無所畏避

考官第其策皆居三等權倖或惡其詆已而不中第者乃註解其策同為唱誨又言涯居翰林其甥皇甫湜中選考覈之際不先上言故同坐焉居數日貫之再出巴州司馬涯號州司馬楊于陵遂出為廣州節度使裴垍時為翰林學士居中覆視無所同異乃為貫之泣訴情罪于上上不得已罷垍翰林學士除戶部侍郎

十五年二月勅先帝所徵賢良方正能直言極諫等科目朕不欲親試宜令中書門下尚書省四品已上官就

尚書省同試吏部尚書趙宗儒奏奉勅以先朝所徵制科舉人令與中書門下四品已上官同于尚書省就試者伏以制科所試本在親臨南省策試亦非舊典況今山陵日近公務繁迫臣商量且宜停罷從之

太和三年以散騎常侍馮宿太常少卿賈餗庫部郎中龐嚴為考官策第二十二人而前進士劉蕢策果切直不居是選其間指陳時事不避貴近言辭激切士林感動雖賈董無以過也而考官有所畏忌不敢上聞隨例

擯斥識者議之喧然不平守道正人傳其文至有相對而泣者諫官等或將其策白于宰臣宰臣怯憚亦不敢為之明白登科人李邵者深有所愧抗表請讓官于資事竟不行又天復初劉季述敗起居郎羅衮上疏請追贈資于是下詔贈左諫議大夫仍訪子孫叙用初資條對制策言宦官權盛後必為患及是而果然也

四年正月德音節文天下諸色人中有賢良方正能直言極諫及經術優深可為師法詳明吏理達于教化等

科委常叅官及方牧郡守各舉所知草澤無人舉者亦聽自舉限來年正月至上都五年正月十七日詔以兵戈未息權停

大中元年二月吏部宏辭舉人漏洩題目為御史臺所劾侍郎裴諗改國子祭酒郎中周敬復罰兩月俸料考試官刑部郎中唐扶出為虔州刺史監察御史馮顥罰一月俸料其登科十人並落下

十二年三月中書舍人李藩知舉下博學宏詞科陳琬

等三人及進詩賦論等召潘謂曰所賦詩中重用字何如潘曰錢起湘靈鼓瑟詩有重用字乃是庶幾上曰此詩似不及起乃落下

孝廉科

貞觀十八年二月六日引汴廊諸州所舉孝廉賜坐于御前上問以皇王政術及皇太子問以曾參考經並不能答太宗謂曰自楚莊王以羣臣莫逮退而有憂色曰諸侯能自得師者王自謀而莫已若者亡今以不穀之

不德羣臣言莫我逮我國能免于亡乎朕發詔徵天下俊異纔以淺近問之咸不能答海內賢哲將無其人耶朕甚憂之

寶應二年六月二十日禮部侍郎楊綰奏請每歲舉人依鄉舉里選察秀才孝廉勅令公卿以下集議中書舍人賈至議曰楊綰所奏實為正論然衣冠遷徙人多僞寓士居鄉土百無一二今依古制恐取士之道未盡今禮部每歲擢甲乙之科祇足長浮薄之風開僥倖之路

矣其國子博士等望加員數十道大郡量置太學令博士出外魚領郡官召致生徒依乎故事保桑梓者鄉里舉焉在流寓者庠序推焉如此則青青不復興刺擾擾由其歸本焉勅旨每州每歲察孝廉取在鄉閭有孝弟廉恥之行薦焉委有司以禮待之試其所通之學五經之內精通一經魚能對策達于理體者並量行業授官其明經進士並停道舉亦宜准此定所司作條件處分七月二十六日禮部侍郎楊綰奏貢舉條每州每歲察

孝廉各令精通一經共取左氏傳公羊穀梁禮記周禮儀禮毛詩尚書周易任通一經每經問義二十條皆取旁通諸義務窮根本試格策三道問古今理體及當時要務取堪行用者仍每日問一道凡三道畢日經義及策全通為上第其上第者望付吏部便與官其問義每十條通七策通二為中第與出身下者罷之又論語孝經皆聖人深旨孟子亦儒門之達者其學官望兼習此三者共為一經其試如上秀才舉望令精通五經問義

二十條對策五道全通者為上第上第者送名中書門下請超與處分問義十條通七策通四為中第中第者送吏部與官下者罷之孝弟力田但能熟讀一經言音典切即令所司舉送試通使與出身至本年舉人或舊業既成理難速改或遠州所送身已在途事須收獎不可中廢其今秋舉入中有情願依舊舉業者亦聽今年之後一依新格勅旨進士明經置來日久今頓令改業恐難其人諸色舉人宜與舊法兼行至建中元年六月

九日勅孝廉科宜停

開元禮舉

貞元二年六月十一日勅開元禮國家盛典列聖增修
今則不列學科藏在書府使勅官者昧于郊廟之儀理
家者不達冠婚之義移風固本合正其源自今已後其
諸色舉入中有能習開元禮者舉人同一經例選人不
限選數許習問大義一百條試三道全通者超資與官
義通七十條策通兩道已上者不在放限其有散官能

通者亦依正官例處分又奉九年五月二十日勅其習
開元禮人問大義一百條試策三道全通者為上等大
義八十條已上策兩道已上為次等餘一切並准三禮
例處分仍永為常式元和八年四月吏部奏應開元禮
及學究一經登科人等舊例據等第高下量人才授官
近日緣校書正字等名望稍優但需科第皆求注擬堅
待員闕或至踰年若無科條恐長僥倖起今已後等第
稍高文學魚優者伏請量注校正其餘置開元禮人太

常寺官有闕相當通經人國子監官闕相當者並請先授以備講討如不情願即通注他官庶幾實有紀律可守其今年以前待闕人亦請依此條限使為常制勅旨依奏

三禮舉

貞元五年五月二日勅王者設教勸學攸先生徒肄業執禮為本然則禮者務學之本立學之端居安之大猷致理之要道姑務弘獎以廣儒風自今已後諸色人中

有習三禮者前資及出身人科目選吏部考試白身依貢舉吏禮部考試每經問大義三十條試策三道所試大義仍委主司于朝官學官中揀選精通經術三五人聞奏主司于同試問義策全通為上等特加超獎大義每經通二十五條以上策通兩道已上為次等依資與官如先是員外試官者聽依正員例其諸館學生願習三禮及開元禮者並聽仍永為常式

三傳舉

三史附

長慶二年二月諫議大夫殷侗奏謹按春秋二百四十
二年行事王道之正人倫之紀備矣故先師仲尼稱志
在春秋歷代立學莫不崇尚其教焉伏以左傳卷軸文
字比禮記多較一倍公羊穀梁與尚書周易多較五倍
是以國朝舊制明經授散若大經中能通習一傳即放
冬習然明經為學者猶十不一二今明經一例冬集人
之常情趨少就易三傳無復學者伏恐周公之微旨仲
尼之新意史官之舊章將墜于地伏請置三傳科以勸

學者左傳問大義五十條公羊穀梁各問大義三十條
策三道義通七以上策通二以上與及第其白身應者
請同五經例處分其先有出身及前資官應者請准學
究一經例處分又奏歷代史書皆記當時善惡係以褒
貶垂示勸戒司馬遷史記班固范曄兩漢書音義詳明
懲惡勸善亞于六經堪為世教伏惟國朝故事國子學
有文史直者弘文館弘文生並試史記兩漢書三國志
又有一史料近日以來史學都廢至于有身處班列朝

廷舊章昧而莫知況乎前代之載焉能知之伏請置前
件史科每史問大義一百條策三道義通七策通二以
上為及第能通一史者請同五經三傳例處分其有出
身及前資官應者請同學究一經例處分有出身及前
資官稍優與處分其三史皆通者請錄奏聞特加獎擢
仍請頒下兩都國子監任生徒習讀勅旨宜依仍付所
司

童子科

廣德二年五月二十四日勅孝弟力田科其每歲貢宜停童子每歲貢者亦停童子仍限十歲以下者至大曆三年三月二十五日勅童子舉人取十歲以下者習一經兼論語孝經每卷誦文十科全通者與出身仍每年令本貫申送禮部同明經舉人例考試訖聞奏至十年十月二十五日勅童子科宜停開成三年十二月勅諸道應薦萬言及朝廷設科取士門日至多有官者合詣吏曹未仕者即歸禮部文詞學藝各盡其長此外更或

招延則為冗長起今以後不得更有支薦俾由正路禁絕倖門雖有是命而以童子為薦者比比有之

明法科

貞元二年六月勅明法舉人有能兼習一小經帖義通者依明法例處分

唐會要卷七十六

欽定四庫全書

史部

唐會要卷七十八

詳校官編修臣溫汝道

編修臣程嘉謨覆勘

總校官降調編修臣倉聖脉

校對官中書臣王學海

謄錄監生臣馮金錫

欽定四庫全書

唐會要卷七十七

宋 王溥 撰

貢舉下

科目雜錄

太和元年十月中書門下奏凡未有出身未有官如有
文學祇合于禮部應舉有出身有官方合于吏部赴科
目選近年以來格文差誤多有白身及散官并稱鄉耆

者並赴科目選及注擬之時即妄論資次曾無格例有司不知所守其有宏辭拔萃開元禮學究一經則有定制然亦請不用在散試官限其三禮三傳一史三史明習律令等如白身並令國學及州府同明經一史三禮三傳同進士三史當年闕送吏部使授第二任官如有出身及有正官本是吏部常選人則放于吏部不限選數應科目選仍須檢勘出身及授官無踰濫否緣取學藝其餘文狀錯謬則不在駁放限如考試登科並依資

注與好官唯三史則超一資授官如制舉人暨諸色人皆得選試則無出身無官人並可亦請不用散試官伏以散試偶于諸道甄錄處得便第二第三任官既用虛銜及授官則勝進士及諸色及第登科人授官實恐僥倖勅旨依奏

大中十三年二月中書門下奏據禮部貢院見置科目內開元禮三禮三傳三史學究道舉明算童子等九科近年取人頗濫曾無實藝可採徒添入仕之門須議條

流俾精重業臣等已于延英面奏伏奉聖旨將文字奏
來者其前件九科臣等商量望起大中十年權停三年
滿後至將赴科試者令有司據所司人先進名令中書
舍人重覆問過如有本業稍通堪備朝廷顧問即作等
第進名候勅處分如事業荒蕪不合送名而妄送者考
官先議朝責其童子近日諸道所薦送者多年齒已過
考其所業又是常流起今後望令天下州薦童子並須
實年十一十二已下仍須精擇經旨全通兼自能書寫

者如違條例本道長史亦宜議懲罰從之

咸通四年二月進士皮日休上疏請以孟子為學科曰
臣聞聖人之道不過乎經經之降者不過乎史史之降
不過乎子子不異乎道者孟子也今國家有業莊列之
書者亦登于科其誘善也則深而懸科也未正伏望命
有司去莊列之書以孟子為主有能精通其義者其科
選視明經同號奏不答

弘文崇文生舉

開元二十六年正月八日勅弘文崇文學生緣是貴胄
子孫多不專經業便與及第深謂不然自今已後一依
令式考試天寶十四年二月十日弘文館學生自今已
後宜依國子監例帖試明經進士帖經並減半雜文及
策皆須粗通仍求為恒式

廣德元年七月二十六日勅弘文崇文兩館生皆以資
蔭補充所習經業務須精熟楷書字體皆得正樣通者
與出身不通者罷之

貞元四年正月勅應補弘文崇文學生員闕至少請補者多就中商量須有先後伏請准建中三年十一月勅先補皇總麻已上親次及宰輔子孫仍于同類之內所用蔭先儘門地清華履歷要近者其餘據官蔭高下類例處分六年九月勅本置兩館學生皆選勲賢胄蓋欲令其議藝紹襲家風固非開此倖門墮紊典教且令式之內具有條章考試之時理須精覈比聞此色倖冒頗深或假市門資或變易昭穆殊愧教化之本但長僥競

之風未補者務取闕員已補者自然登第用蔭既已乖實
試藝又皆假人誘進之方豈當如此自今已後所司宜
據式文考試定其升黜如有假貸並准法處分

太和七年八月九日勅弘文兩館生今後並依式試經
畢日仍差都省郎官兩人覆試須責保任不得輒許替
代

九年十二月中書門下奏奉進止令減下諸色入仕人
其弘文館學生見定十六人今請減下一人勅旨依

奏

開成三年二月兩軍使狀稱請准太和元年五月十七日以前勅文官階至三品便許用蔭與子孫補兩館出身三月勅神策大將軍用蔭補兩館生宜准左右金吾大將軍例處分

崇玄生道舉附

開元二十五年正月十五日于玄元皇帝廟置崇玄學令習道德經莊子文子列子待習成後每年隨舉人例

送名至省准明經考試通者准及第人處分其博士置一員

天寶元年五月中書門下奏兩京及諸郡崇玄學生等准開元二十九年正月制前件人合習道德及南華通玄沖虛等四經又准天寶元年二月制改庚桑子為洞靈真經准請條補崇玄學亦合習讀伏准後制合通五經其洞靈真經人間少本臣近令諸親尋訪道士全無習者本既未廣業實難成并沖虛通玄二經亦恐文字

不定玄教方闡學者宜精其洞靈等三經望付所司各
寫十本校定訖付諸道採訪使頒行其貢舉司及兩京
崇玄學生亦望各付一本今冬崇玄學人望其准開元
二十九年正月制考試其洞靈真經請待業成後准式
從之

二年三月十六日制崇玄生試及帖策各減一條三年業
成始依常式

七載五月十三日詔崇玄生出身至選時宜減于常例一

選以為留放

十三載十月十六日道舉停習道德經加周易命以來
年為始至寶應二年六月二十日道舉勅停七月二十
六日禮部奏道舉就停其崇玄生望付中書門下商
量處分

大歷三年七月增置崇玄生員一百

建中元年二月中書門下奏准制崇玄館學生試日減
策一道者其崇玄館附學官見任者既同行事例合霑恩

惟策一道不可更減大義兩條從之

論經義

貞觀十二年國子祭酒孔穎達撰五經義疏一百七十卷名曰義贊有詔改為五經正義太學博士馬嘉運每稍撫之有詔更令詳定未就而卒

永徽二年三月十四日詔太尉趙衛公長孫無忌及中書門下及國子三館博士弘文學士故國子祭酒孔穎達所撰五經正義事有遺謬仰即刊正至四年三月一

日太尉無忌左僕射張行成侍中高季輔及國子監官
先受詔修改五經正義至是功畢進之詔頒于天下每
年明經依此考試

長安三年三月四門博士王元感表上尚書糾謬十卷
春秋振滯二十卷禮記繩愆三十卷并所註孝經史記
漢書並請官給紙筆寫上秘閣制令弘文崇玄兩館學
士及成均博士詳其可否弘文館學士祝欽明崇玄館
學士李憲趙元亨成均博士郭山惲皆專守先儒章句

深譏元感元感倚撫舊義不之屈唯鳳閣舍人魏知古
司封郎中徐堅左史劉知幾右史張思敬雅好異聞每
為元感申理其義由是擢拜太子司議郎

開元七年三月一日勅孝經尚書有古文本孔鄭註其
中旨趣頗多踳駁精義妙理若無所歸作業用心復何
所適宜令諸儒并訪後進達解者質定奏聞其月六日
詔曰孝經者德教所先自項已來獨宗鄭氏孔氏遺旨
今則無聞又子夏易傳近無習者輔嗣注老子亦甚甄

明諸家所傳互有得失獨據一說能無短長其令儒官
詳定所長令明經者習讀若得理解亦可並行其作易
者並帖子夏易傳共寫一部亦詳其可否奏聞時議以
為不可遂停

四月七日左庶子劉子玄上孝經註議曰謹案今俗所
行孝經題曰鄭氏註爰自近古皆云鄭即康成而魏晉
之朝無有此說至晉穆帝永和十一年及孝武帝太和
元年再聚羣臣共論經義有荀昶者撰集孝經諸說始

以鄭氏為宗自宋梁以來多有異論陸澄以為非玄所
註請不藏于秘省王儉不依其請遂得見傳于時魏齊
明立于學官著在律令蓋由庸俗無識故致斯訛舛然
則孝經非玄所註其驗十有二條據鄭自序云遭黨錮
之事逃難註禮黨錮事解註古文尚書毛詩論語為袁
譚所逼來至元城乃註周易都無註孝經之文其驗一
也鄭玄卒後其子弟追論師註所述及應對時人謂之
鄭志其言鄭所註者惟有毛詩三禮尚書周易都不言

鄭註孝經其驗二也又鄭志目錄記鄭之所註五經之外有中候書博士政論乾象歷六藝論毛詩譜答賓難三禮駁許慎異義發墨守箴膏肓及答甄然子等書寸紙片札莫不悉載若有孝經之註無容匿而不言其驗三也鄭之弟子分授門徒各述師言更不問答編錄其錄謂之鄭記唯載詩書禮易論語其言不及孝經其驗四也趙商作鄭先生碑銘具稱其所註箋駁論亦不言著孝經晉中經簿周易尚書中候尚書大傳毛詩周禮

儀禮禮記論語凡九書皆云鄭氏註名玄至于孝經則
稱鄭氏解無名玄二字其驗五也春秋緯演孔圖云康
成註三禮詩易尚書論語其春秋孝經別有評論宋均
于詩譜序云我先師北海鄭司農則均是玄之傳業子
弟也師所著無容不知而云春秋孝經唯有評論非玄
之所註于此特明其驗六也又宋均孝經緯註六藝論
敘孝經云玄又為之著司農論如是而均無聞焉有義
無辭令余昏惑舉鄭而語云無聞其驗七也宋均緯註

云玄為春秋孝經畧疏非註之謂所言玄又為之註者
汎辭耳非事實序春秋亦云玄又為之註也寧可復責
以實註春秋乎其驗八也後漢史書存于代者有謝承
薛瑩司馬彪袁崧等具為鄭玄傳者載其所註皆無孝
經其驗九也王肅孝經傳首有司馬宣王之奏並奉詔
令諸儒註述孝經以肅說為長若先有鄭註亦應言及
而不言鄭其驗十也王肅著書發揚鄭短凡有小失皆
在聖證若孝經此註亦出鄭氏被肅攻擊最應煩多而

肅無言其驗十一也魏晉朝賢辨論時事鄭氏諸註無
不撮引未有一言引孝經之註其驗十二也凡此證驗
易為考覈而代之學者不覺棄彼謬說競相推舉諸解
不立學官此註獨行于世觀夫言語鄙陋固不可示彼
後來傳諸不朽至如古文孝經孔傳本出孔氏壁中語
其詳正無俟商確而曠代亡逸不復流行殊不可解至
開皇十四年秘書學士王孝逸于京市賈人取置得一
本送與著作郎王邵以示河間劉炫仍令按定而此書

更無魚本難可依憑炫輒以所見率意刊改因著古文
孝經稽疑一篇邵以為此書經文盡在正義甚美而歷
代未嘗置于學官良可惜也然則孔鄭二家雲泥致隔
今綸旨發問校其短長愚謂孔行鄭廢于義為允又今
俗所行老子是河上公註其序云河上公者漢文帝時
人結草菴于河曲乃以為號所註老子授文帝因沖空
上天此乃不經之鄙言流俗之虛語按漢書藝文志註
老子者三家河上所釋無聞焉爾豈非註者欲神其事

故假造其說耶豈如王弼所著義旨為優必黜河上公
升王輔嗣在于學者實得其宜又按漢書藝文志講易
十三家初無子夏作傳者至梁阮氏七錄始有子夏易
六卷或云韓嬰作或云丁寬作然據漢書藝文志韓易
有二篇丁易有八篇求其符會則事殊隱刺者矣歲越
千齡時經百代其所著述沈翳不行豈非後來假憑先
哲亦猶石崇謬稱阮籍鄭瓊濫名周寶必欲行用深以
為疑竊以鄭氏孝經河上公老子二書訛舛不足流行

孔王兩家實堪師授每懷此意其願莫從伏見去月十日勅令所司詳定四書得失具狀聞奏臣等尋草議請行王孔二書牒禮部訖如狀為允請即頒行國子祭酒司馬貞議曰今之孝經是漢河間王所得顏芝本至劉向以此本叅校古文省除煩惑定為此一十八章其註相承云是鄭玄所著而鄭志及目錄等不載故往賢共疑焉唯荀昶范曄以為鄭注故昶集解孝經具載此註而其序云以鄭為主是先達博選以此註為優其註縱

非鄭氏所作而義旨敷暢將為得所其數處小有未穩
實亦非爽經旨其古文二十二章先出孔壁先是安國
作傳緣遭巫蠱世未之行荀昶集註之時尚有孔傳中
朝遂亡其本近儒欲從古學妄作此傳假稱孔氏輒穿
鑿改更又偽作閨門一章劉炫詭隨妄稱其善且閨門
之義近俗之語非宣尼之正說案其文云閨門之內具禮
矣乎嚴親嚴兄妻子臣妾繇百姓徒役也是比妻子于徒役
文句疵鄙不合典經又分庶人章從故自天子以下別

為一章仍加子曰二字然故者連上之辭既是章首不合言故古人既亡後人妄闢此等數以應二十二章之數非但經文不真抑且傳習淺偽又注因天之時因地之利其畧曰脫衣就功暴其肌體朝暮從事露髮跣足少而習其安焉此語雖傍出諸子而引之為注何言之鄙俚乎與鄭氏所云云分別五土視其高下高田宜黍稷下田宜稻麥優劣懸殊曾何等級今議者欲取近儒諸說殘經缺傳而廢鄭注理實未可望請准式孝經鄭

注與孔傳依舊俱行又注老子河上公蓋憑虛立號漢
史實無其人然其註以養人為宗以無為為體其辭近
其理弘小足以修身絜誠大可以寧人安國且河上公
雖曰註書即文立教皆首闡明體用可謂知言矣王輔
嗣雅善玄談頗深道要窮神用于橐籥守靜默于機緘
其旨深微在于玄學頗是所長至若近人立徵修身弘道
則河上為得今望請王河二注令學者俱行又按劉向
七畧有子夏易傳但此書不行已久今所存者多非真

本又荀勗中經簿云子夏傳四卷或云丁寬所作是先達疑非子夏矣又隋書經籍志云子夏傳殘缺梁時六卷今三卷是知其書錯謬多矣無益後學不可將帖正經

五月五日詔曰間者諸儒所傳頗乖通議敦孔學者冀鄭門之息滅尚今文者指左傳為誣偽豈朝廷並列書府以廣儒術之心乎其河鄭二家可令依舊行用王孔所注傳習者稀亦存繼絕之典子夏傳逸篇令帖易者

停

十四年八月六日太子賓客元行沖等撰禮記義疏五十卷成奏上之先是右衛長史魏光乘上言今禮記章句踳駁故太師魏徵更編次改注堪立學傳授上遽令行沖集學者撰義疏將立學官行沖于是引國子博士范行恭四門助教施教本檢討刊削及疏成右丞相張說駁奏曰今之禮記是前漢戴德戴聖所編歷代傳習已向千年著為經教不可刊削至魏徵孫炎始改舊本

以類相比有同抄書先儒所以竟不行用貞觀中魏徵因
孫炎所修更加釐改魚為之注雖加賞賜其書竟亦不
行今行沖等奉勅撰疏勒成一部欲與先儒義理章句
隔絕若欲行用竊恐未可上然其奏遂留其書貯于內
府竟不得立學行沖怨諸儒排已退而著論以自釋

其年八月十四日上讀洪範至無頗以聲不協韻因改
頗為陂詔曰朕思文皆協韻惟頗一字實覺不倫又周
易中無平不陂考陂字亦有頗音陂之與頗訓詁無別

為陂則文亦會意為頗則聲不成文應由煨燼之餘編
簡遂缺傳授之際差誤相沿原始要終須有刊草洪範
無頗字宜改為陂庶使先儒之義去彼膏肓後學之徒
正其魚魯仍宣示國學

天寶五載正月二十三日詔曰禮記垂訓篇目攸殊或
未盡于通體是有乖于大義借如堯命四子所授惟時
周分六官曾不繫月先王行令蓋取于斯苟分至之可
言何弦望之足舉其禮記月令宜改為時令

其載二月二十四日詔曰朕欽承聖訓覃思玄經項改
道德經載字為哉仍隸屬上句及乎廷議衆以為然遂
錯綜真詮因成註解又孝經書疏雖粗發明幽蹟無遺
未能該備今更敷暢以廣闕文仍令集賢院具寫送付
所司頒示中外

貞元七年十二月秘書監包佶奏開元刪定禮記月令
為時令其音及義疏並未刊正其開元禮所與月令相
涉者請選通儒詳定從之

開成二年八月勅新加九經字樣一卷國子監奏定得
覆定石經字體翰林待詔唐玄度狀伏准太和七年二
月勅覆定九經字體者令所詳覆多依司業張參五經
字為準其舊字樣歲月將久畫點參差傳寫相承漸致
乖誤今並依字樣書參詳改邪就正訖諸經之中分別
疑闕舊字樣未載者古今體異隸篆不同如總據說文
即古體驚俗若近代之文字或傳寫乖謬乞令與校勘官
同商較是非取其適中纂錄為新刊九經字樣一卷或

經典相承與字義不同者引文以註解今刊削成請附于九經字樣之末勅旨宜依

諸使上

觀風俗使

自貞觀八年以後不置

貞觀八年正月二十九日詔曰昔者明王之御天下也內列公卿允釐庶績外延侯伯司牧黎元惟懼淳化未敷名教或替故有巡狩之典黜陟幽明行人之官存省風俗時雍之化率由茲道宜遣大使分行四方申諭朕

心延問疾苦觀風俗之淳澆察政刑之苛弊務盡使乎
之旨俾若朕親覲焉于是分遣蕭瑀李靖楊恭仁竇靜
王珪李大亮劉德威皇甫無逸韋挺李襲譽張亮杜正
倫趙智等巡省天下

巡察按察巡撫等使

貞觀十八年遣十七道巡察諫議大夫褚遂良諫曰臣
以為自去年九月不雨經冬無雪至今年二月下澤麥
苗始似小可使人今出正是農時普天之下不能無事

東州追掩西郡呼集魚復送迎使人供擬飲食道路遑遑廢于田種使人今猶未發時節如是小遲望更過今夏至來年正月初發遣書曰萬方有罪在于一人國家但得四方整肅何必要須罪罰

二十年正月遣大理卿孫伏伽等二十一人以六條巡察四方多所甄別太宗命褚遂良以其類具狀以聞及是親臨決牧守以下以能官進擢者二十人罪死者七人流罪以下免黜數百人

儀鳳二年五月河南河北旱遣御史中丞崔鎰等分道
存問賑給侍御史劉思正上疏曰今麥序方秋蠶功未
畢三時之務萬姓所先勅使巡撫人皆悚忤忘其家業
冀此天恩踴躍奉迎必難抑止集衆既廣妨廢亦多加
以逾程往還魚之晨夕停滯既緣賑給須立簿書本欲
安存却成煩擾又無驛之處取馬稍難簡擇公私須先
追集雨後農要特切常情暫廢須臾即虧歲計每為一
馬遂勞數家從此相承恐更滋甚望且委州縣賑給待

秋後閒時出使褒貶

垂拱元年秘書省正字陳子昂上疏曰臣伏見陛下憂勞百姓恐不得其所將降九道大使巡察天下諸州兼申黜陟以求人瘼臣竊以為未盡善也何以言之陛下所以降明使豈非欲天下黎元衆庶知陛下夙興夜寐憂勤念之陛下必若以此而發使乎則愚臣竊見陛下之使又未盡善也若愚臣所請使者先常雅合時望為衆所推慈愛足以勤恤孤惇賢德足以振拔幽滯剛直足

以不避強禦明智足以照察奸邪然從使天下奸人畏其明而不敢為惡也天下強禦憚其直而不為過也天下英雄慕其德而樂為之用也天下孤寡賴其仁而欣戴其德也夫如是然後可以論出使故輶軒未動于京師天下翕然皆已知矣今陛下使猶未出朝廷行路市井之人皆以為非在朝廷之有職者亦不稱之天子之使未出魏闕朝廷之人皆已輕之何況天下之衆哉而欲黜陟求賢未可得也陛下所以有此失者在不選人

亦輕此使非天下之任故陛下遂大失于此苟以出使
為名不求任使之實使愈出而天下愈弊使彌多而天
下彌不寧其故何哉是朝廷輕其任也徒使天下百姓
修飾道路送往迎來無益于聖教耳臣久為百姓實委
知之臣願陛下與宰相更妙選朝廷百官素有威重名
節為衆所推者陛下因大朝日親御正殿集百寮公卿
設禮儀以使者之禮見之告以出使之意遂授以旌節
而遣之先從京師徧訪豺狼然後攬轡登車以清天下

若如是臣知陛下聖教不旬月之間天下家見而戶聞也此之一使是陛下為政之大端諺曰欲知其人先觀其所使不可不慎也若陛下必知不可得其人不如不出使以煩數無益于化但勞天下之人是猶烹小鮮而數撓之耳四月六日尚書左丞狄仁傑充江南安撫使吳楚多淫祠仁傑一切焚之凡除一千七百所

天授二年發十道存撫使以右肅政御史中丞知大夫事李嗣真等為之舉朝有詩送之名曰存撫集十卷行

于世杜審言崔融蘇味道等詩尤著焉

萬歲通天元年鳳閣舍人李嶠上疏曰陛下創置左右
臺分巡天下察使人善否觀風俗得失斯政途之綱紀
禮法之準繩無以加也然猶有未折衷者臣請試論之
夫禁網尚疎法令宜簡簡則事易行而不煩雜疎則所
罹寡而無苛碎竊見垂拱二年諸道巡察使科目凡四
十四件至于別作格勅令訪察者又有三十餘條而巡
察使率是三月之後出都十一月終奏事時限迫促簿

書委積晝夜奔逐以赴限期而每道所察文武官多至二千餘人少尚一千已下皆須品量才行褒貶得失欲令曲盡行能則皆所不暇此非敢惰于職而慢于官也實才有限而力不及耳臣望量其功程與其節度使器周于用力濟于時然後進退可以責成得失可以精覈矣

聖歷元年十月納言狄仁傑為河北河朔安撫使及回上疏曰臣聞朝廷議者以契丹作梗始明人之順逆或

有迫脅或有願從或授偽官或為招慰或魚外賊或是
土人跡雖不同心實無別誠以山東強猛由來重氣一
顧之勢至死不迴近緣軍機調發傷重家道悉破或至
逃亡別屋賣田人不為售內顧生計四壁皆空重以官
典侵漁因事而起當州役使十倍軍機官私不矜期之
必取加杖之下痛切肌膚事迫情危不修禮義愁苦之
地不樂其生有利則歸且圖賒死此乃君子之媿辱小
人之常行今以負罪之位必不在家露宿草行潛竄山

澤赦之則出不赦則逃山東羣盜因緣聚結臣以邊塵
雖起不足為憂中國不安以此為事臣聞持大國者不
可以小道理事廣大者不可以苛細分人主恢宏不拘
常法罪之則衆情恐懼恕之則反側自安伏願曲赦河
北諸州一無所問自然人神通暢率土歡心

神龍二年二月勅左右臺內外五品已上官識理道通
明無屈撓者二十人分為十道巡察使二周年一替以
廉按州部

景龍二年置十道按察使分察天下至開元八年五月復置十道按察使以陸象先等為之

開元元年二月禮部侍郎張庭珪上疏曰天下至大郡邑至多賢牧良宰誠難盡得兼下僚貪暴小吏侵漁黎庶不安窮困衆矣縱其發使廉問暫往速還假令申寃却招後患各思矢口無敢率心臣竊見國家比置十道按察使不限年月懲惡勸善激濁揚清孤窮獲安風俗一變伏望復下明制重選使臣秋冬之後令出巡察自

然貪吏望風懲革陛下視聽恒遍于海內矣

三年三月勅巡察使出宜察官人善惡其有戶口流散籍帳隱沒賦役不均者不務農桑倉庫減耗者妖訛宿習姦猾盜賊不事生業為公私蠹害者德行孝弟茂才異等藏器晦迹堪應時用者並訪察聞奏

興元元年正月詔令門下平章事肅復充山南東西荆湖淮南江西鄂州浙江東西福建嶺南等道宣慰安撫使嗚呼往率乃職敬敷朕命慰勉征戍勞來困窮訪其

所安察其所弊滯淹必達冤濫必申無憚幽遠而不被
無忽細微而不恤

貞元八年八月詔曰朕以薄德托于人上勵精庶政思
致雍熙而誠不動天政或多闕陰氣作沴暴風荐臻自
江淮而及乎荆湘歷陳宋而施于河朔其間郡邑連有
水災城郭多傷公私為害損壞廬舍浸敗田苗或親戚
漂淪或資產沈溺言念于此當食忘餐宜令中書舍人
奚陟往江陵及襄郡隨復鄂申光蔡等州左庶子姚齊

語往陳宋毫穎徐泗濠等州秘書少監雷咸往鎮冀德
隸深趙等州京兆少尹常武往揚楚廬潤壽滁蘇常湖
等州宣撫應諸州百姓因水不能自存者委宣撫使賑
給死者各加賜物在官為收理埋瘞其田苗所損委宣
撫使與所在長吏速具聞奏於戲一夫不獲一物失所
刑罰不中賦役不均皆可以失陰陽之和致雨旱之沴
繫因疑獄訴久不決者委所在長吏即與昭雪務從寬
簡俾絕冤滯貪官暴吏苛法害公特加懲罰用明典憲

災傷之後切在撫綏咨爾方鎮之臣洎乎守宰咸宜悉乃心力以恤凶災宣布朕懷使各知悉

永貞元年八月詔曰理天下者先修其國國命之重寄在方鎮方鎮共理實准列城為政繫于屬縣然則一夫之耕匹婦之織積微至著以供國計永為烝庶厥惟難哉頃年以上准租賦徭役權稅委在藩服使其均平在太上皇君臨之初務從省便遂令今使府歸在中朝或恐巡按院既多職因交替新制未立舊綱已紊況河汴

而東瀕海之右名都輿壤疆理接連如或徭賦不均徵
輸難濟物輕貨重法弊人勞又開江淮數道比憊時兩
深憂黎庶之不足軍國之缺供政有所不宣事有所未
便牧宰有課績官吏有臧否爰使使臣申我休命宜令
度支及諸道鹽鐵轉運戶部侍郎兼御史大夫潘孟陽
專往宣諭慰安疲甿詢訪便益蠲除疾苦安人利國稱
朕意焉

元和四年正月以左司郎中鄭敬使湖南宣歙吏部郎

中崔兗使浙東司封郎中孟簡使山南東道荆南湖南
京兆少尹襄武使江西鄂岳等道宣撫將行並召對上
告之曰朕宮中用度一匹以上皆有簿歷惟拯救百姓
則不計所費焉卿等今者賑恤災旱當勤于奉職勿如
潘孟陽所到務飲酒遊山寺而已仍許敬等以便宜行
事以孟簡獨衣綠遣使追賜緋袍銀魚

十四年二月東都知兵馬使劉悟斬逆賊李師道淄青
兗鄆等十二州平詔戶部侍郎楊於陵以本官充淄青

等州宣撫使

唐會要卷七十七

欽定四庫全書

唐會要卷七十八

宋王溥撰

諸使中

黜陟使

貞觀八年將發十六道黜陟大使畿內未有其人上問房玄齡此道事最重誰可充使尚書右僕射李靖曰畿內事宜非魏徵莫可上曰朕今欲向九成宮事亦不小朕

每行不欲與其相離者過為其見朕過必無所隱乃令李靖充使

二十年遣大理卿孫伏伽等以六條巡察四方黜陟官吏

開元二十二年四月二十一日遣使以崔翹等為之天寶五載七月遣使以席豫等為之

至德二載十二月遣使以號王等為之

建中元年正月制諸道宜分遣黜陟使觀風俗問疾苦

自艱辛以來徵賦名目繁雜委黜陟使與諸道觀察使
刺史計資產作兩税法比來新舊徵科色目一切停罷
兩稅外輒別配率以枉法論乾元元年與採訪使並權
罷至是復有之自建中已後至今未嘗置初司封郎中
韋正為山南黜陟使薦興鳳兩相團練使嚴震理行為
山南第一特賜上下考封鄖國公在鳳州十四年能政
不替

採訪取置使

宰相張九齡奏置

開元二十二年二月十九日初置十道採訪取置使以御史中丞盧綯等為之至三月二十三日諸道採訪取置使華州刺史李尚隱等奏請各使置印許之

二十五年十二月二十四日命諸道採訪使考課官人善績三年一奏永為常式至二十七年二月七日赦文三載考績黜陟幽明允叶太猷以勸天下比來諸道所通善狀但優仕進之輩與為選調之資責實循名或乖古義自今已後諸道使更不須善狀每三年朕常自擇

使臣觀察風俗有清白政理著聞者當別擢用

二十六年三月勅諸道採訪使判官等自今已後並須
首末經三年其緣事故停不得滿年限者承優節文準
開元二十四年二月十九日勅處分

二十九年七月勅採訪使等所資按部恤隱求瘼巡撫
處多事須周細不可忽遽徒有往來宜依刺史例入奏
天寶九載三月十二日勅本置採訪使令舉大綱若大
小必由一人豈能兼理自今已後採訪使但察訪善惡

舉其大綱自餘郡務所有奏請並委郡守不須干及
十二載二月河南道採訪取置使河東郡太守李愷河
南道採訪處置使陳留郡太守王濬等奏請依舊通前
置兩員文使望以周載許依元勅酬功處分勅諸道準
此黔中道各一人宜依舊定

乾元元年四月十一日詔曰近緣狂寇亂常每道分置
節度其管內緣徵遣及文牒魚使命來往州縣官非不
艱辛若更加採訪轉益煩擾其採訪使置來日久并諸

道黜陟使便宜且停待後當有處分

其年改為觀
察處置使

大歷十二年五月中書門下奏開元末置諸採訪使許其專停刺史務廢置由已請自今已後刺史有犯贓等色本道但具狀聞奏不得輒追赴使及專擅停務差人權攝其刺史亦不得輒詣使出界有違者皆按常刑

五坊宮苑使

五坊謂鵬鵠鷹鷄狗共為五坊宮苑舊以一使掌之自寶應二年後五坊使入隸內宮苑使近又有閑廐使兼

宮苑之職焉

開元十九年金吾將軍楊崇慶除五坊宮苑使其後來
曜牛仙客李元裕韋衡章仇兼瓊王鉷呂崇貴綦輔國
彭體盈藥子昂等為之

大歷十四年五月詔鷹隼豹狃獾犬皆放之自永徽以
來揮國累貢馴象三十有二皆養于禁中有善舞者以
備元會充庭之飾因是于鷹隼之類同放之

元和二年六月初五坊戶諸色影占者多宜令府縣收

管

三年七月五坊品官朱超宴王志忠放縱鷹隼入常安
富人家旋詣其居廣有求取上知之立召二人各答二
十奪其職自是貢鷲鳥畧大者皆斥之貞元末五坊小
兒張捕鳥雀于閭里者皆為暴橫以取人錢物或有張
羅網于門不許人出入者或以張井上使不得汲者近
之輒曰汝鷲供奉鳥雀即痛毆之出錢物求謝乃或相
聚于食市酒肆醉飽而去賣者或不知就索其直多被

毆詈或時留蛇一囊為質曰此所以致鳥雀而捕之者
今留付汝幸善飼之勿令飢渴賣者魏謝求哀乃攜挈
而去憲宗在春宮時知其弊嘗欲奏禁之及即位遂推
而行人情大悅

十三年十月上怒五坊使楊朝汶追捕平人命殺之

事具

宰相忠
諫

皇城使

天祐三年閏十二月皇城使奏伏以皇城之內咫尺禁

圍伏乞準元勅條流鼓聲絕後禁斷人行近日軍人百姓更點動後尚恣夜行特乞再下六軍止絕從之

元帥

武德元年六月七日秦王世民加西封元帥

上元三年三月相王旦除涼州道元帥周王亨除洮河道元帥昇儲後至聖歷元年九月又除河北道行軍大元帥亦稱大行臺元帥大足元年六月相王旦除安北道行軍元帥至長安二年九月又除并州道行軍元帥

自後親王為銜者甚多其元帥之號自武德已來唯王
始拜至天寶十五載正月哥舒翰除諸道兵馬元帥始
臣下為之乾元二年三月郭子儀除山南東道拜河南
道諸道節度防禦兵馬元帥後上元二年七月李光弼
除淮南河南淮西山南東道荆南五節度行營元帥此
並副元帥也

至德元年以廣平王為天下兵馬元帥統大軍東征以
子儀為副

其載九月吏部尚書平章事房瑄特請兵一萬人自為
元帥以收兩京詔許之以兵部尚書王思禮為副分為
三軍使楊希文將南軍自宜壽入劉貴愬將中軍自武
功入李光進將北軍自奉天入而瑄以中軍為元帥次
便橋二軍先遇賊戰于陳濤王師敗績時瑄以車二千
乘以馬步夾之為乘車之戰賊順風揚塵鼓噪牛皆振
駭因縛草縱火焚之人畜大亂故敗瑄自將南軍又戰
不利楊希文劉貴愬降于賊瑄幕府偏裨等奔赴行在

肉袒請罪詔並宥之

四載九月以舒王謨為揚州大都督持節充荆南襄江
鄂等道節度諸軍行營兵馬都元帥仍賜名諡改封晉
王大開幕府文武僚屬之盛前後出師未見其比

天福三年三月以輝王祚為諸道兵馬元帥

其年十二月十三日勅國史所書元帥之任並以天下
為名乃自近年設為諸道宜却復為天下兵馬元帥

都統

乾元元年十二月戶部尚書李恒除都統淮南江東江西節度宣慰觀察處置等使都統之號始于此

上元二年八月李若幽除戶部尚書充朔方鎮西北庭興平陳鄭等九節度行營兵馬及河中節度都統處置使

建中元年十二月以汴州節度使李勉充河南汴州宋滑毫河陽等道都統使

元和四年九月以邠寧夏三州節度高崇文充西京都

統

大中五年五月以特進守司空兼門下侍郎平章事白敏中充邠寧節度使招討南山平夏党項兵馬都統取置等使

元和四年九月以宣武軍節度韓弘充淮西諸軍行營兵馬都統

乾符五年黃巢大掠江淮宰相王鐸進奏曰臣忝宰執之長在朝不足分陛下之憂願自帥諸軍盪滌羣寇朝

議然之乃拜守司空平章事荆南節度使諸道行營兵馬都統其年以鎮海軍節度使高駢為諸道行營兵馬都統

中和二年復以宰相王鐸為京城四面諸道行營兵馬都統以崔安潛副之至大順元年五月以宰臣張濬為京東北面兵馬都統

節度使

每使管內軍附

武德元年因隋舊制呼為大總管其年六月七日諸州

總管加號使持節至七年二月十八日改大總管為大都督

貞觀三年八月李靖除定襄道行軍大總管貞觀三年已後行軍即稱總管本道即稱都督永徽已後除都督帶使持節即是節度使不帶節者不是節度使景雲二年四月賀拔延嗣除涼州都督充河西節度使此始有節度之號遂至于今不改

朔方節度使開元元年十月六日勅朔方行軍大總管

宜準諸道例改為朔方節度使其定遠豐安軍西中城
單于豐勝靈夏鹽銀匡長安樂等州並受節度至十四
年七月除王浚帶關內支度營田等使十五年五月除
蕭嵩又加鹽池使二十年四月除牛仙客又加押諸蕃
部落使二十九年除王忠嗣又加水運使天寶五載十
二月除張齊邱又加管內諸軍採訪使已後遂為定額
豐安軍在靈州黃河西去郡一百八十里

定遠軍在靈州北二百里先天二年正月郭元振置

貞觀十三年三月十五日置朔使以護突厥

即舊朔方節度之號

河東節度使開元十一年以前稱天丘軍節度其年三月四日改為太原已北諸軍節度至十八年十二月宋之悌除河東節度已後遂為定額大同軍置在朔方州本大武軍調露二年裴行儉改為神武軍天授二年改為平狄軍大定元年五月十八日改為大武軍開元十二年三月四日改為大同軍橫塞軍初置在飛狐復移于蔚州開元六年六月二十三日張嘉貞移于右代都

大安城南以為九姓之援天寶十三載十二月一日改為大德軍寄嵐軍武德中為鎮永淳二年改為柵隸平狄軍長安三年李迺秀改為軍張仁亶置移軍朔方留一千人充守捉屬大武軍開元十二年崔隱甫又置軍十五年李嵩又廢為鎮其後又改為軍

天興軍聖歷二年四月置大足元年五月十八日廢長安元年八月又置景雲元年又廢開元五年六月二十四日張嘉貞又置十一年三月四日改為太原已北諸

軍節度使

清塞軍貞元十五年四月以清塞城為軍

開元九年十一月四日勅河東河北不須別置支度並令節度使自支度

隴右節度使開元元年十二月鄯州都督闕矩除隴右節

度自此始有節度之號至十五年十二月除張志亮又魚經畧度支營田等使已後為定額臨洮軍置在狄道縣開元七年移洮州縣就此軍焉

河源軍置在遼州東西又云本道充國亭侯也

白水軍開元五年郭知運張懷亮置

安人軍置在星宿州鄆州西北界開元七年三月置

積石軍置在廓州達化縣西界本吐谷渾居地貞觀三年吐谷渾叛置靜邊鎮儀鳳二年置軍額焉

英門軍置在洮州儀鳳二年置軍開元十七年洮州移隸臨潭百姓隸岷州置臨州二十年七月又改為洮州今為臨洮軍是也

振武軍置在鄯州鄯城縣西界吐蕃鐵仞城亦名石堡城開元十八年三月二十四日信安王拔之置四月改為鎮武軍又二十九年十二月六日蓋嘉運不能守遂陷吐蕃天寶八載六月哥舒翰又拔之閏六月三日改為神武軍

威戎軍置在鄯州界開元中杜希望收吐蕃新城置

鎮西軍置在河州開元二十六年八月置

神策軍天寶十三載七月十七日隴右節度哥舒翰以

前年收黃河九曲請分其地置洮陽郡內置軍焉以成
如璆為太守充神策軍使去臨洮軍二里

宛秀軍同前年分九曲置澆河郡內置軍焉以臧奉忠
為太守充軍使

保義軍元和元年二月改隴右經略使為軍

河西節度使景雲二年四月賀拔廷嗣為涼州都督充
河西節度使自此始有節度之號至開元二年四月除
楊執一又兼赤水九姓本道度支營田等使十一年四

月除張敬忠又加經畧使十二年十月除王君奭又加長行轉運使自後遂為定額也

赤水軍置在涼州西城本赤烏鎮有泉水赤因以為名武德二年七月安修仁以其地來降遂置軍焉軍之大者莫過于此

新泉軍大定元年郭元振奏置開元五年改為守捉使天斗軍本是守捉使開元十六年改為天斗軍焉

建庫軍置在甘肅二州界證聖元年王孝傑開西鎮迴

以兩州界曠遠置此軍焉

寧寇軍舊同在城等守捉天寶元年五月五日遂置焉

王門軍本廢王門縣開元六年置軍焉

墨離軍本是月支舊國武德初置軍焉

豆盧軍置在沙州神龍元年九月置軍

白亭軍天寶十四載正月三日置

開元十四年三月二日勅河西長安行轉運九姓即隸
入節度使宜加度支判官一人

安西四鎮節度使開元六年三月楊嘉惠除四鎮節度
經畧使自此始有節度之號十二年已後或稱磧西節
度或稱四鎮節度至二十一年十二月王斛斯除安西
四鎮節度遂為定額又先天元年十一月史獻除伊西
節度魚瀚海軍使自後不改開元十五年三月又分伊
西北庭為兩節度至二十九年十月二十九日移隸伊
西北庭都屬四鎮節度使至天寶十二載三月始以安
西四鎮節度封常清兼伊西北庭節度瀚海軍使

伊吾軍本昆吾國也置在伊州景龍四年五月置

天山軍置在西州漢車師前王故國地形高敞改名高昌貞觀十四年置瀚海軍置在北都護府本烏孫王境也貞觀十四年置庭州文明元年廢州置焉長安十二年二月改為燭龍軍三年郭元振奏置瀚海軍大軍並在碎葉城

范陽節度使先天二年甄道一除幽州節度經畧鎮守使開元十五年除李尚隱又帶河北度支營田使二十

七年除李遷之加河北海運使天寶元年除裴寬為范陽節度使經畧河北度支營田河北海運使遂為定額經畧軍置在范陽城內延載元年置

漁陽軍在幽州北盧龍右塞開元十九年改為靜塞軍清夷軍垂拱二年媯州刺史鄭崇古奏置

威武軍大定元年置在檀州

北平軍在定州西三里

恒陽軍恒州郭下

高陽軍本瀛州開元二十年移在易州

唐興軍在莫州

橫海軍在滄州並開元十四年四月十二日置各以刺史為使

懷柔軍在蔚州界先天元年八月八日置

鎮安軍貞元二年四月二十二日於燕城守捉置

懷遠軍在故遼城天寶二年二月安祿山奏置焉

平盧軍節度使開元七年閏七月張敬忠除平盧軍節

度使自此始有節度之號八年四月除許欽琰又帶管內諸軍諸蕃及度支營田等使二十八年二月除王斛斯又加押兩蕃及渤海黑水等四府經畧處置使遂為定額

平盧軍在柳城本古遼西之地

盧龍軍置有北平郡古孤竹國天寶二年置

開元十三年三月二十日勅平盧軍幽州太原朔方河西隴右劍南等七道節度使宜各置木契行勘

劍南節度使開元五年二月齊景昌除劍南節度使度
支營田魚姚嵩等州處置兵馬使因此使有節度之號
至八年除李潛始下魚兵馬使二十七年除仇魚瓊又
魚山南西道採訪使其後或魚或不魚無定制至上元
二年二月分為西川廣德二年正月八日合為一道大
歷二年正月二十日又分為兩州至今不改貞元十一
年九月韋臯為節度就加統攝近界諸蠻魚西山八國
雲南安撫等使

天寶軍置在雍州開元二十九年置

洪源軍置在黎州漢黎郡地開元三年置軍

昆明軍置在嵩州開元十七年十一月置

嶺南節度使至德二載正月賀蘭進明除嶺南五府經
畧兼節度使自此始有節度之號已前但稱五府經畧
自此遂為定額又杜佑為嶺南節度使德宗興元朝執
政往往出為節度故嶺南節度常兼五管經畧使佑獨
不兼蓋一時之誤後遂不帶五管經畧名目至咸通三

年五月分為兩節度以廣州為嶺南東道邕州為嶺南
西道

清海軍天寶元年置在思州

柔遠軍貞元七年三月二十三日置

淮南河南江東道乾元元年三月六日置節度使

鎮州節度使大歷十四年四月名其軍曰成德至天祐
二年九月改為武順汴宋亳節度使建中三年二月二
日名其軍曰宣武

浙江節度使建中二年六月分浙江東西節度使尋改為鎮海軍以團練為節度徙理潤州元和五年十一月團練使奏丹陽軍北因置節度改為鎮海今請依前置鎮海軍從之

滑州節度使貞元元年五月罷滑州永平軍其年四月名其軍曰義成淮西節度使貞元二年二月改淮西節度為淮寧軍

申光蔡等道節度使貞元十四年正月名其軍曰彰義

易定節度使貞元十五年三月滿城縣置永清軍建中三年五月名其軍曰義武

安黃節度使貞元十九年二月名其軍曰奉義

陳許節度使貞元二十年四月名其軍曰忠武

徐州節度使貞元二十一年三月名其軍曰武寧至咸通四年四月降為支郡隸兗州至十一年十一月改為感化軍

劍南節度使元和二年二月改天威軍

荆南節度使元和六年八月勅制荆南是賦稅之地與
關右諸鎮及河南河北有重兵處體例不同節度使之
外不合更置軍額因循已久煩弊實深嚴綬所請停永安
軍額宜依其合收錢米委嚴綬于當府諸縣蠲除不支
濟人戶均藏訖聞奏

天平軍節度使元和十四年三月平李師道以所管十
二州分三節度使總為天平軍節度其一為兗海沂密
節度一為平盧軍節度仍加押新羅渤海兩蕃使仍舊

為平盧軍賜兩蕃使印一面

河陽節度使會昌四年十月平賊以河陽三城鎮遏使為孟州號河陽軍額憚二州隸焉

歸義軍節度大中五年八月沙州刺史張義潮以瓜沙伊肅等十一州戶口來獻自河隴陷蕃百餘年至是悉獲故地乃以沙州為歸義軍授義潮節度使

戎昭軍節度使天佑二年九月以金州置軍額三年四月復以為州

義昌軍節度使太和五年正月以滄景德州號義昌軍
山南東道節度使乾元元年置節度元和十年十月分
為兩節度以戶部侍郎李遜為襄復郢等節度使右羽
林大將軍高霞寓為唐鄧隋節度使景雲二年正月二
十九日勅諸道節度使除緣兵馬外不得別理百姓訴
訟事元和六年十月詔曰朕于百執事羣有司方澄源
流以責實効其諸都都團練使足修武備以靜一方而
別置軍額因加吏祿亦既虛設頗為浮費思去煩以循

本期省事以便人潤州鎮海軍宣州采石軍越州義勝
軍洪州南昌軍福州靜海軍等使額並宜停所收使以
下俸科等事以上各委本道充代百姓闕額兩稅仍具
數聞奏庶幾愛人之心不至于惜費立制之意必在於
正名

十三年二月襄陽節度使李愬奏請判官大將已下一
百五十員上不悅謂裴度曰李愬誠立奇功然奏請過
當遂留中不下其年七月詔曰事闕軍旅並屬節務繫

州縣悉歸察廉二使所領不同管轄諸道度支營田承
前各別置使自艱虞以後事稍因循方鎮除授之時或
有兼帶此職遂領所在各殊今者務修舊章思一法度
去煩就理衆心為正唯別置營處其使且令仍舊其忠
武鳳翔武寧魏博山南東南橫海邠寧義成河陽等道
度支營田使及淮南度支近已定省其餘諸道並準此
處分初景雲開元間節度度支營田等使諸道並置又
一人兼領者甚少艱難以來優寵節將天下擁旄者常

不下三十人例銜節度度支營田觀察使其邊界藩鎮
增置名額者又不前後十餘年雖嘗增減官員及使
額而度支營田以兩河諸將魚領故朝廷不議停廢至
是羣盜漸息宰臣等奏罷之

乾符三年以宰臣鄭從讜為北京留守河東節度使詔
許自擇賓佐

親王遙領節度使

貞觀二年正月蜀王恪除使持節大都督益綿邛維眉

雅等八州諸軍事益州刺史越王泰除使持節大都督揚州常和潤楚舒廬潯壽歙蘇杭宣東睦南和等十六州諸軍事揚州刺史

開元四年正月二十九日鄴王嗣直除安西大都護充安撫河東關內隴右諸蕃部落大使陝王嗣昇為西都護仍充河西道及四領諸蕃部落大使安西大都護張知運為副都護親王遙領節度自茲始也其在軍節度即稱節度副大使知節度事十五年五月以慶王潭為

涼州都督兼河西節度大使忠王浚為單于大都護朔
方節度大使棣王洽為太原已北諸軍節度大使鄂王
曄為幽州都督河北節度大使營王滉為京北牧隴節
度大使光王浚廣州都督五府節度大使儀王澐河南
牧穎王灋安東都護平盧節度大使永王澤荊州大都
督壽王法益州都督劍南節度大使延王洄安西大都
護磧西節度大使盛王沐揚州大都督

建中元年八月以舒王誼為涇原節度大使

貞元四年七月以虔王諒為光隨蔡節度觀察大使

七年七月以邕王諒為義武軍節度易定等州觀察使
九年十二月以通王諒為宣武節度使

十年七月復以邕王諒為昭義軍節度使

十一年五月復以通王諒為河東節度大使西都留守
十六年九月以開府儀同三司虔王諒為除州節度大
使觀察度支營田等使

元和二年八月以建王審為鄆州大都督平盧節度觀

察等使陸運海運押新羅兩蕃等使

九年三月以遂王宥開府儀同三司充彰義軍節度管內營田申光蔡等州觀察處置等使

寶曆元年十二月以晉王普為昭義軍節度副大使知節度事以劉悟子前將作監主簿從諫為節度留後

太和八年十二月以通王諶為幽州經畧盧龍軍節度副大使知節度事以勾當幽州兵馬元忠為留後

開成五年十二月以福王綰開府儀同三司行魏州大

都督充魏博等州節度觀察處置等使

會昌二年正月以撫王紘開府儀同三司行幽州大都督充幽州盧龍軍節度觀察處置押奚契丹兩蕃經畧盧龍軍等

四年十一月以皇子諤為開府儀同三司朔方軍節度副大使知節度事時以党項叛命故以親王制之大中十一年以昭王訥為開府儀同成德軍節度副大使知節度事以佐司馬王紹知成德軍兩使留後

咸通十年十二月以蜀王信為開府儀同三司劍南西川節度副大使知節度使以盧耽知西川事

乾符四年正月以壽王傑為開府儀同三司幽州經畧盧龍軍節度副大使知節度事以李可舉知幽州兵馬事

宰相遙領節度使

開元十五年十一月兵部尚書河西節度副大使知節度事蕭嵩除同中書門下平章事節度如故宰相遙領

節度使自茲始也至二十六年正月中書令李林甫遙
領隴右節度天寶十載十一月楊國忠又遙領劍南節
度蕭嵩以牛仙客為留後李林甫以杜希望為留後楊
國忠以崔圓為留後

諸使雜錄

上卷附

貞觀元年四月發諸道檢點使

咸亨三年十二月領下檢點格其年五月十一日勅中
書門下兩省供奉官及尚書省御史臺見任郎官御史

自今已後請使不得奏請保使永為常式

二年三月十一日關內道覆囚使邵師德等奉辭上謂
曰州縣諸囚未斷甚廢田作令遣爾等理之非遣殺之
無濫刑也至開元十年十月宇文融除殿中侍御充覆
囚使

儀鳳二年十二月二十七日詔宜令關內河東簡練有
膂力雄果者即以猛士為名

三年正月二十五日遣左金吾將軍曹懷舜李知十等

分往河南河北以募猛士

萬歲通天元年九月令山東近境州置武騎團兵至聖
歷元年臘月二十五日河南河北置武騎團以備默啜
每一百五十戶共出兵十五人馬一匹

先天二年正月十五日詔往者計戶充兵使二十二人
募六人出軍既憚劬勞咸欲逃匿不有釐革將何致理
天下衛士取年二十五已上充十五年放出頻經征鎮
者十年放出自今已後羽林飛騎先于衛士中簡擇

長壽三年正月許諸州大都督及上州刺史大都督府
長史諸軍經畧鎮守大使一子為宿衛官

開元十年六月七日勅度支營田若一使專知宜同為
一額共置判官兩人

十一年二月二十九日勅同華兩州精兵所出地資輦
穀不合外支自今已後更不得聚同華兵防容其休息
二十一年正月二十四日勅令百寮尋勝因置檢校尋
勝使以厚其事

天寶七載十一月給事中楊釗充九成宮使

其使及水炭使並是

岐州刺史勾當入釗至是移屬權臣其時釗南監倉使農出納錢物召募劍南健兒兩京太倉嘉倉出納召募河西隴右健兒催諸道租庸等事

蘇氏駁曰九寺三監東宮三寺十二衛及京兆河

南府是王者之有司各勤所守以奉職事尚書舊

章立程度以頒之御史臺按格令採姦濫以繩之

中書門下立百司之體要察羣吏之能否善績著

而必進敗德聞而且貶政有恒而易為事歸本

而難失經遠之理捨此奚據自姦臣廣言利以邀
恩多立使以示寵尅小民以厚斂張虛數以獻狀
上心蕩而益侈人望怨而成禍使天子有司守其位
而無其事受厚祿而虛其用宇文融首倡其端楊
慎矜王鉷繼遵其軌楊國忠成其亂仲尼云寧有
盜臣而無聚斂之臣誠哉是言前車既覆後轍未
改欲求化本不亦難乎

十二載十二月二十二日左相陳希烈充秘書省圖書

使

十四載十一月安祿山叛命諸山當賊衝者始置防禦使至寶應元年五月十九日停諸州防禦使

乾元二年七月九日勅宜令御史大夫充曠騎使令御史充判官

廣德二年九月以太子詹事李峴為江南東西及福建等道知選事并勸農宣慰使

大歷十二年五月十日中書門下狀奏諸州團練守捉

使請一切並停其勅使日有持節諸軍旅司馬即同副使之任其判司既帶叅軍事望令司兵判兵司按司倉判軍糧按司事判甲仗按具兵士量險隘召募謂之健兒給春冬衣并家口糧當上百姓名曰團練春秋歸冬夏追集日給一身糧及醬菜其月十一日諸道先置上都留後使宜令並改為上都進奉縣官十三日諸道觀察都團練使判官各置一人支使一人推官一人餘並停

十四年二月四日勅諸都諸道上都知進奏院官自今已後並不須與正官

六月一日勅郎官御史充使絕本司務者宜改與檢校及內供奉裏行其月五日勅御史中丞董晉中書舍人

薛蕃給事中劉迺宜充三司使仍取右金吾廳一所充

使院并于西朝室置幕屋收詞訟

至建中二年十月停後不常置有大獄即

命丞刑部侍郎大理卿充謂之大三司使其次以刑部員外郎御史大理寺官為之以決疑獄謂之三司使

待事畢

日罷

建中二年正月二十五日潭開宜依舊置防禦使

二月十八日却置京畿觀察使以長史袁高充使

三年九月九日御史中丞楊瑱奏見任官或被諸司使

奏使移文牒充判官伏請自今已後應見任州縣正官

非承制勅差補不得輒離任勅旨依焉其月二十三日

停

建中元年四月一日門下侍郎楊炎充刑定格式使五

月闕日刑部侍郎蔣況充副使二年七月中書侍郎張

鑑與盧杞同充格式使

貞元三年三月二十三日勅杜亞宜兼充管內營田使
其楚州營田使宜停

四年二月勅諸道幕府判官及諸軍將比奏改官例多
超遷應從散慢入清望官並折資處分

十三年六月加劍南西山運糧使檢校戶部員外郎韋

肇兼御史大夫

員外兼大
夫新例

十四年六月罷宣歙池三州鄂岳沔三州都團練觀察

使陝虢西州都防禦觀察使以其地分隸諸道置東畿觀察以留臺御史中丞為之

十六年十二月勅諸道觀察都團練防禦及度支營田經畧招討等使應奏副使行軍判官支使叅謀掌書記推官巡官請改轉臺省官宜三周年以上與改轉其緣軍務急功事跡殊常即奏聽進止

元和二年正月鄂岳等州觀察使呂元膺奏親妹壻京兆府咸陽尉馬維授試大理評事充京兆觀察度支使

為憲司所劾密親佐幕有虧典法勅諸使府叅佐檢校
釋元膺之罪時咸非之

七年七月勅諸使府叅佐檢校應試官員日計如是五
品已上官及臺省官經三十箇月外任奏與改轉餘官
經三十六箇月奏改如經考試別有事故及停替官本
限之外更加十箇月即往申奏從之

十三年二月浙東觀察使孟簡受代詔書到日按故事
署留後而行及常州堂牒勒還舊鎮待割使事而後行

初李修授浙西觀察使中謝日請留所替以待交割使事至是因舉為例非舊制也

十三年七月以宣歙觀察使事至重因舉王遂為淄清四面行營供軍使

其年九月詔諸道新授節度觀察經畧等使自勅出後使未到以前或前使尚在本鎮或已發差知留軍務等官其軍府職員多停省改易自今以後切令禁止縱先有此色新使道到並令仍舊

十四年二月詔諸道節度使團練都防禦經畧等使所
管諸郡除本州軍事外別置鎮遏守捉兵馬者並令屬
刺史等本州團練都防禦鎮遏等使其兵馬額便隸此
使如無別使即屬軍事其有邊徼溪洞接連蕃蠻之處
建城鎮不關州郡者即不在此限

自軍興以來天下有
軍將帥之權尤重過

於所管
州郡

其月山南東道觀察使孟簡舉均州鄖鄉縣鎮遏兵馬
使趙絜充本縣令有紊條章罰一月俸料

其年四月命中官五人為京西和糴使諫議大夫鄭覃
右補闕高鉞等同上疏論上覽之即日罷其使

其年八月以侍省姚文壽充京西京兆行營宣慰計會
使六月制以左金吾衛大將軍胡證充京西京北巡邊
使所經過州鎮與節度防禦使勅詳審商量利害具事
實聞奏因程昇之請也七月罷晉州防禦使八月浙東
觀察使薛戎奏準勅諸道所管支郡別置鎮遏守捉兵
馬者宜並屬刺其邊徼溪洞接連蠻夷之處時建城鎮

者則不在北限合當道望海鎮明州去七十里餘俯臨
大海東與新羅日本諸蕃接界諸度支不屬明州許之
十五年十二月中書門下奏因外六品已下正員官諸
道諸使奏充掌職北限兩考及授官經二年已上方許
奏請然後依資改轉有才在下位者不免留滯請今後
諸道諸使應奏請正員官充職掌經一周年即與依資
改轉未一周年與同類試官從之

舊制使府判官二周
年始許改轉通許二

考謂之得資與同類試官

今不依舊典物議非之

長慶三年三月勅諸道軍府大將帶監察已上官者三
周年與改轉如是加勅合非時與改者不在此限其大
將未曾奏官者即亦仰奏焉

四年二月勅諸道節度使去任日宜準元和十五年七
月十五日勅處分其交割狀限新使到任後一箇月內
分析聞奏并報中書門下據替限委中書門下據報狀
磨勘聞奏以憑殿最

寶歷元年十二月江西觀察使殷侑奏管內州縣官大

半勾當留在京師而當道兩稅外又有旨支米見在官
稅兩充細者今請下有司上從之仍勅諸道准此



唐會要卷七十八